

DRUGA REGIONALNA KONFERENCIJA EPALE

Od 9. do 10. novembra 2017. održana je II Regionalna konferencija EPALE (Elektronska platforma za obrazovanje odraslih u Evropi) u hotelu Bosna u Banja Luci u organizaciji Agencije za predškolsko, osnovno i srednje obrazovanje. Tema konferencije bila je *Kvalitet u obrazovanju odraslih*, a u radu konferencije je sudjelovalo preko 80 učesnika - andragoških djelatnika i stručnjaka iz više europskih zemalja (Slovenija, Hrvatska, Crna Gora, Srbija i Bosna i Hercegovina). Konferenciju su organizovali NSS timovi Slovenije, Hrvatske, Crne Gore i domaćin Bosne i Hercegovine. Tijekom dvodnevnog rada konferencije stručnjaci iz područja obrazovanja odraslih informirani su o najnovijim trendovima i aktualnostima kako na državnom, regionalnom tako i na evropskom nivou, uključujući i primjere dobre prakse. Bitno je istaknuti da je karakter konferencije prerastao u međunarodni i samim tim podigao kvalitetu rada

Konferenciju je svečano otvorio, u ime ministra civilnih poslova, zamjenik ministra Vojin Mijatović. Prisutnima se također obratio, u ime domaćina, zamjenik direktorice Agencije za predškolsko, osnovno i srednje obrazovanje, Siniša Gatarić.

Prvi dan konferencije započeo je izlaganjem direktora Andragoškog Centra Slovenije, Andreja Sotošeka, na temu *„Razvoj sistema kvaliteta u oblasti obrazovanja odraslih“*, Gordana Bošković, savjetnik za obrazovanje odraslih, Centar za stručno obrazovanje Crne Gore nam je govorila o *„Indikatorima kvaliteta u obrazovanju odraslih“*, a Ivana Vulić, Fondacija Tempus Srbija, o *„Kvalitetu u karijernom vođenju i savjetovanju“*. U drugom dijelu dana smo imali dvije edukativne i stručne prezentacije na temu *„Online oglašavanje“*, Amra Sofić te *„Sigurnosti i zaštita podataka na internetu“*, Samir Mujović.

Drugi dan svoja izlaganja su održali Tatjana Vulin, Pučko otvoreno učilište "Ante Babić" Umag, *„Ustanove za obrazovanje odraslih kao dionici regionalnog razvoja cjeloživotnog učenja“*, profesorica Senada Dizdar, Filozofski fakultet Univerziteta u Sarajevu, *„Obrazovanje odraslih u umreženom društvu“*, Amina Isanović Hadžiomerović, Filozofski fakultet Univerziteta u Sarajevu, *„EPALE kao podloga transformativnom učenju“* te profesorica Mirjana Mavrak sa temom *„EPALE između teorija potreba, kvaliteta u obrazovanju i istraživačkih mogućnosti“*.

Kroz formalni i neformalni dio konferencije učesnici su imali mogućnost da se umreže i na regionalnom nivou ostvare međusobnu saradnju. Ovo se pokazalo kao velika prednost za provajdere u Bosni i Hercegovini koji pripremaju nove programe za svoje polaznike.

10. novembra održan je i EPALE sastanak Nacionalnih službi za podršku Slovenije, Hrvatske, Crne Gore i Bosne i Hercegovine na kojem smo razmjenjivali iskustva i primjere dobre prakse te dogovarali buduću suradnju. Sve novosti, događanja i fotografije vezane uz EPALE možete pogledati na Facebook stranici EPALE Bosna i Hercegovina.

Kroz bogat program konferencije istaknuti stručnjaci za obrazovanje odraslih, IKT tehnologije i medije za oglašavanje informirali su učesnike, prenijeli im svoja iskustva te omogućili sticanje novih andragoških znanja i vještina čime ujedno stiču mogućnost podizanja kvalitete posla koji obavljaju na još viši nivo.

Nakon zaključnog dijela, državni koordinator za EPALE Bosne i Hercegovine, g. Denis Fazlić, zahvalio je svim sudionicima i predavačima na njihovom doprinosu te zatvorio ovogodišnju konferenciju i najavio održavanje III Regionalne konferencije EPALE koja će biti u Crnoj Gori.